



TOSHKENT DAVLAT YURIDIK UNIVERSITETI REKTORINING B U Y R U G ' I

2020-yil «21» dekabr

02-232-son

Танлов ўтказиш тўғрисида

Ўзбекистон Республикаси Президентининг 2020 йил 29 апрелдаги “Ўзбекистон Республикасида юридик таълим ва фанни тубдан такомиллаштириш бўйича қўшимча чора-тадбирлар тўғрисида”ги ПФ–5987-сон Фармонида белгиланган вазифалар ижросини таъминлаш ҳамда талабаларнинг билими, малакаси, амалий кўникмасини аниқлаш ҳамда уларни рағбатлантириш мақсадида

БУЮРАМАН:

1. 2020 йил декабрь – 2021 йил май ойларида Тошкент давлат юридик университети ҳамда Жаҳон иқтисодиёти ва дипломатия университети 2-, 3-, 4-курс талабалари ўртасида Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш бўйича танлов ташкил этилсин.

2. Мазкур танлов Ўзбекистон Республикаси Олий суди, БМТ Тараққиёт дастури (БМТ ТД), АҚШ Халқаро тараққиёт агентлиги (USAID)нинг “Ўзбекистонда қонун устуворлиги йўлида ҳамкорлик” қўшма лойиҳаси доирасида ўтказилиши инobatга олинсин.

3. Қўйидагилар:

Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш бўйича танлов ўтказиш тартиби тўғрисидаги низом 1-иловага;

Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш бўйича танлов комиссия таркиби 2-иловага мувофиқ тасдиқлансин.

4. Фуқаролик процессуал ва иқтисодий процессуал ҳуқуқи кафедраси мудири Д.Хабибуллаев мазкур танловни юқори савияда ўтказиш билан боғлиқ зарур чораларни кўрсин.

5. Мазкур буйруқ ижросини назорат қилиш проректор И.Рустамбеков зиммасига юклансин.

Ректор



Р.Хакимов

Лойиҳа киритилди:

Фуқаролик процессуал ва
иқтисодий процессуал ҳуқуқи
кафедраси мудири

Д.Хабибуллаев

Келишилди:

Ўқув ишлари бўйича проректор

И.Рустамбеков

Катта юрисконсульт

Э.Хосилов

Тошкент давлат юридик университети ҳамда Жаҳон иқтисодиёти ва дипломатия университети 2-, 3-, 4-курс талабалари ўртасида Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш бўйича танлов ўтказиш тартиби тўғрисида

НИЗОМ

I. Умумий қоидалар

1. Мазкур Низом Тошкент давлат юридик университети ҳамда Жаҳон иқтисодиёти ва дипломатия университети 2-, 3-, 4-курс талабалари ўртасида Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш бўйича танловни (бундан буён матнда танлов деб юритилади) ўтказиш босқичлари, тартиби, баҳолаш мезонлари ҳамда суд ҳужжатларини таҳлили ва шаклига қўйиладиган талабларни белгилайди.

2. Танловни ўтказишдан мақсад – талабаларнинг билими, малакаси, амалий кўникмасини аниқлаш, талабаларни электрон одил судлов воситаларидан кенг фойдаланишни йўлга қўйиш, мамлакатда ўтказилаётган демократик ва ҳуқуқий ислохотларнинг юқори талабларига, замонавий халқаро стандартларга жавоб бера оладиган юридик кадрларни рағбатлантиришдан иборат.

Танловни ўтказиш билан боғлиқ асосий вазифалар:

талабаларнинг фуқаролик, иқтисодий, маъмурий ва жиноят ишлари бўйича судлар томонидан чиқарилган суд ҳужжатларини таҳлил қила олиш бўйича қобилиятини аниқлаш;

талабаларнинг моддий ва процессуал қонун нормаларини амалда қўллай олиш бўйича кўникма ва малакаларини ошириш;

талабаларда мустақил ишлаш кўникмаларини ривожлантириш, ахборот ресурслари манбаларидан самарали фойдаланишни ташкил этиш;

талабаларнинг олган назарий билимларини амалиёт билан уйғунлигини таъминлашга эришиш;

талабаларнинг мантиқий ва танқидий фикрлаш ҳамда мустақил ишлаш бўйича амалий кўникмаларини шакллантириш.

3. “Ўзбекистон Республикаси Олий судининг веб-сайтида эълон қилинган суд ҳужжатларини таҳлил қилиш” танлови Тошкент давлат юридик университетида ўтказилади.

II. Танлов ташкилотчилари

4. Танловнинг ташкилотчилари қуйидагилардир:

Ўзбекистон Республикаси Олий суди, БМТ Тараққиёт дастури (БМТ ТД), АҚШ Халқаро тараққиёт агентлиги (USAID)нинг “Ўзбекистонда қонун устуворлиги йўлида ҳамкорлик” қўшма лойиҳаси;

Тошкент давлат юридик университети (бундан буён матнда ТДЮУ деб юритилади).

5. Танловни уюшқоқлик билан ўтказиш ва танлов ғолибларини аниқлаш мақсадида Танлов комиссияси ташкил этилади. Танлов комиссиясининг таркиби ТДЮУ томонидан тасдиқланади.

6. Танлов комиссияси:

танловнинг ҳолислигини таъминлаш мақсадида талабалар томонидан бажарилган ишларни идентификация кодлари бериш йўли билан шифрлайди;

танлов иштирокчилари тақдим этган суд ҳужжатлари таҳлилинини ўрганиб чиқади;

танлов иштирокчилари томонидан бажарилган ишларни мазкур Низомга илова қилинган баҳолаш мезонлари асосида баҳолайди;

танлов ғолибларини аниқлайди.

7. Танловни уюшқоқлик билан ўтказиш танлов ташкилотчилари томонидан амалга оширилади.

8. Танловда фақат ТДЮУ ва Жаҳон иқтисодиёти ва дипломатия университетининг 2-, 3-, 4-курс талабалари иштирок этишлари мумкин.

III. Танловни ўтказиш босқичлари

9. Танлов икки босқичда амалга оширилади.

Биринчи босқич 2021 йил 20 январдан 20 мартгача бўлиб ўтади. Бунда танлов иштирокчилари томонидан фақат Ўзбекистон Республикаси Олий судининг веб-сайтида эълон қилинган исталган битта суднинг ҳужжатлари яъни фуқаролик, иқтисодий, маъмурий ва жиноят судларининг биринчи инстанция судида кўриб чиқарган ҳал қилув қарорлари, ҳукмлари бўйича таҳлили бўйича ишлар танлов комиссиясига тақдим этилади.

Иккинчи босқич 2021 йил 20 мартдан 20 апрелгача бўлиб ўтади. Бунда танлов иштирокчилари томонидан тақдим этилган ишлар танлов комиссияси томонидан ўрганилади ва баҳоланади.

10. Танлов комиссиясига тақдим этилган ишлар ушбу Низом иловасида келтирилган баҳолаш мезонлари асосида 100 баллик тизимда баҳоланади.

Танлов иштирокчиларининг ишларини баҳолаш натижалари бўйича баллар тенг бўлган ҳолларда ғолиб танлов комиссияси қарори билан аниқланади.

IV. Танловни ўтказиш тартиби

11. Танловга ишларни қабул қилиш учун эълон ТДЮУнинг расмий веб-сайти ва ижтимоий тармоқлардаги саҳифаларида берилади. Шунингдек, ўтказилаётган танлов ҳақида тегишли олий ўқув юртларига хат орқали маълум қилиниши мумкин.

12. Суд ҳужжатлари таҳлили бўйича ишлар шахсан муаллиф томонидан қоғоз шаклида ёки танлов тўғрисидаги эълонда кўрсатилган электрон манзилга танлов комиссиясига тақдим этилади. Электрон манзилга тақдим этилган таҳлиллар бўйича иштирокчиларга таҳлил қабул қилинганлиги тўғрисида электрон жавоб хати йўлланилади.

13. Тақдим этилган ишлар танлов комиссияси томонидан ҳолисона, ҳалол ва адолатли баҳоланиши учун идентификация кодлари бериш йўли билан шифрланади. Шифрланган ишлар танлов комиссияси аъзоларига юборилади. Танлов комиссия аъзолари томонидан ишлар текшириб бўлинганидан сўнг дарҳол танлов комиссия котибига тақдим этилади. Танлов комиссияси томонидан танлов иштирокчиларининг фамилияси, исми, отасининг исми идентификация қилинган ҳолда жамловчи электрон баҳолаш қайдномаси шакллантирилади ва унинг натижалари танлов комиссияси котиби томонидан юритиладиган баённома билан расмийлаштирилади.

Ғолиблар қуйидаги йўналишлар бўйича аниқланади:

энг яхши фуқаролик ишлари бўйича суд ҳал қилув қарорлари таҳлили;

энг яхши иқтисодий ишлари бўйича суд ҳал қилув қарорлари таҳлили;

энг яхши маъмурий суд ҳал қилув қарорлари таҳлили;

энг яхши жиноят ишлари бўйича суд ҳукмлари таҳлили.

Танлов комиссияси танлов иштирокчиларини ҳар бир йўналишдаги суд ҳужжатлари таҳлили бўйича тўплаган баллдан келиб чиққан ҳолда 1-ўрин, 2-ўрин ва 3-ўрин билан аниқлайди.

14. Танлов натижалари ТДЮУнинг расмий веб-сайти ва ижтимоий тармоқлардаги саҳифаларида эълон қилинади.

15. Танлов ғолиблари 2021 йил май ойида ташкилотчилар томонидан ТДЮУда ташкил этиладиган тақдирлаш маросимида диплом ҳамда Ўзбекистон Республикаси Олий суди, БМТ Тараққиёт дастури (БМТ ТД), АҚШ Халқаро тараққиёт агентлиги (USAID)нинг “Ўзбекистонда қонун устуворлиги йўлида ҳамкорлик” қўшма лойиҳаси томонидан молиялаштириладиган совғалар билан тақдирланади.

16. Танловда иштирок этиб ғолиб бўлмаган иштирокчиларга махсус сертификатлар топширилади.

17. Танловда ғолиб бўлган таҳлиллар битта тўпламга умумлаштирилиб ТДЮУнинг расмий веб-сайтида чоп этилади.

V. Суд ҳужжатлари таҳлили бўйича ишларнинг мазмуни ва шаклига қўйиладиган талаблар

18. Суд ҳужжатлари таҳлили бўйича ишларнинг шаклига қуйидаги талаблар қўйилади:

ишнинг титул варағида олий таълим муассасаси номи, танлов иштирокчиси Ф.И.Ш., телефон рақами, курси ва ҳужжатлар таҳлил қилинган суднинг номи (фуқаролик, иқтисодий, маъмурий ва жиноий суд);

матни Word дастуридан фойдаланган ҳолда Times New Roman шрифтида, 14-ўлчамда, 1.5 интервалда бўлиши;

ҳар бир саҳифа рақамланиши, саҳифа мўлжали китоб шаклида, юқори ва пастки майдони – 2 см, ўнг тараф – 1,5 см, чап тараф – 3 см бўлиши;

тақдим этиладиган ишлар камида 2000 (икки минг) сўздан иборат бўлиши;

ҳужжат охирида Ўзбекистон Республикаси Олий судининг веб-сайтида эълон қилинган суд қарорлари бўйича таҳлил қилган суд ҳужжатлари, ишнинг тартиб рақами, иш тури, иш кўрилган сана ёзилган бўлиши керак.

19. Суд ҳужжатлари таҳлили бўйича ишларнинг мазмунига қуйидаги талаблар қўйилади:

ҳуқуқий атамаларни тўғри қўлланилиши;

таҳлилда тегишли норматив-ҳуқуқий ҳужжатлардан ва Ўзбекистон Республикаси Олий суд Пленум қарорларидан фойдаланганлик даражаси;

таҳлилнинг сифати;

келтирилган фикр-мулоҳазанинг илмий-амалий асосланганлиги;

суд ҳужжатларини таҳлил қилишда касб ва одоб-ахлоқ қоидаларига риоя этилиши (плагиат, маълумотларни сохталаштириш, ёлғон цитаталар келтиришга йўл қўйилмаслиги);

суд ҳужжатини таҳлил қилишда суд қарорлари иш турлари бўйича таснифланиши.

20. Танлов иштирокчилари томонидан ишлар ўзбек ёки рус тилларида тақдим этилиши мумкин.

21. Ишларга қўйилган талабларга мувофиқ келмайдиган, плагиатга йўл қўйилган, муаллифи кўрсатилмаган ҳамда белгиланган муддатдан кейин тақдим этилган ишлар танлов комиссияси томонидан кўриб чиқилмайди ва баҳоланмайди.

VI. Яқуний қоидалар

22. Танловда иштирок этиш учун тақдим этилган ишлар муаллифларга қайтарилмайди.

23. Танлов иштирокчилари томонидан танлов натижалари юзасидан берилган ариза ва шикоятлар танлов комиссияси томонидан кўриб чиқилмайди.

Суд ҳужжатларини таҳлили бўйича баҳолаш мезонлари

№	Суд ҳужжатлари таҳлилини баҳолаш мезонлари	Баллар миқдори
1.	<p>суд ҳужжати таҳлили бўйича ёзилган иш унга қўйилган талабларга тўла мувофиқ тарзда ёзган бўлиши;</p> <p>танланган суд ҳужжати таркибий қисмлари атрофлича таҳлил қилинган бўлиши;</p> <p>тегишли норматив-ҳуқуқий ҳужжатлардан ва Ўзбекистон Республикаси Олий суд Пленум қарорларидан мувофиқ равишда фойдаланиши;</p> <p>таҳлилни юқори даражада сифатли амалга оширганлиги;</p> <p>суд ҳужжатида моддий ва процессуал қонун нормаларини нотўғри қўлланилиши ёки бузилганлигини тўғри, тўлиқ аниқлай олган бўлиши;</p> <p>суд ҳужжати таҳлили ёзма шаклда содда ва тушунарли баён қилиниши;</p> <p>суд ҳужжати таҳлилини грамматик, орфографик жиҳатдан тўғри ёза олиши;</p> <p>суд ҳужжати таҳлилида фойдаланилган адабиётлар рўйхати келтирилган бўлиши;</p> <p>келтирилган фикр-мулоҳаза ҳамда таклифларни илмий-амалий ва ҳуқуқий жиҳатдан асослантириб бериши;</p> <p>суд ҳужжатини таҳлил қилишда камида 50 та суд ҳужжати ўрганилиши;</p> <p>суд ҳужжатини таҳлил қилишда суд ҳужжатлари иш турлари бўйича таснифланиши;</p> <p>суд ҳужжатини таҳлил қилишда касб ва одоб-ахлоқ қоидаларига риоя этиши (плагиат, маълумотларни сохталаштириш, шунингдек ёлғон цитаталар келтиришга йўл қўймаслиги).</p>	86-100 балл
2.	<p>суд ҳужжати таҳлили бўйича ёзилган иш унга қўйилган талабларга мувофиқ тарзда ёзган бўлиши;</p> <p>танланган суд ҳужжати таркибий қисмлари тўлиқ таҳлил қилинмаганлиги;</p> <p>суд ҳужжатини таҳлил қилиш қобилиятини ўрта даражада кўрсата олиши;</p> <p>таҳлилни ўрта даражада амалга оширганлиги;</p> <p>суд ҳужжатида моддий ва процессуал қонун нормаларини нотўғри қўлланилиши ёки бузилганлигини тўлиқ аниқлай олмаганлиги;</p> <p>суд ҳужжати таҳлили ёзма шаклда содда ва тушунарли баён қилиниши;</p>	71-85 балл

	<p>суд ҳужжатлари доирасида умумий билимларга эга эканлигини, бироқ уларни таҳлил қилиш, мушоҳада қилиш кўникмаси юқори даражада эмаслигини кўрсатиши;</p> <p>суд ҳужжати таҳлилида фойдаланилган адабиётлар рўйхати тўлиқ келтирилмаганлиги;</p> <p>суд ҳужжатини таҳлил қилишда камида 40 та суд ҳужжати ўрганилиши;</p> <p>суд ҳужжатини таҳлил қилишда суд ҳужжатлари иш турлари бўйича таснифланиши;</p> <p>келтирилган фикр-мулоҳаза ҳамда таклифларнинг илмий-амалий ва норматив жиҳатдан асослаши.</p>	
3.	<p>суд ҳужжати таҳлили бўйича ёзилган иш унга қўйилган талабларга қисман мувофиқ келиши;</p> <p>танланган суд ҳужжати таркибий қисмлари қоникарли даражада таҳлил қилинганлиги;</p> <p>суд ҳужжатлари таҳлил қилиш қобилиятини ўрта даражада кўрсата олиши;</p> <p>таҳлилни ўрта даражада амалга оширганлиги;</p> <p>суд ҳужжатида моддий ва процессуал қонун нормаларини нотўғри қўланилиши ёки бузилганлиги аниқланмаганлиги;</p> <p>суд ҳужжати таҳлили қоникарли тарзда амалга оширилганлиги;</p> <p>суд ҳужжатлари доирасида умумий билимларга эга эканлигини, бироқ уларни таҳлил қилиш, мушоҳада қилиш кўникмаси қоникарли даражада эканлигини кўрсатиши;</p> <p>суд ҳужжатини таҳлил қилишда камида 30 та суд ҳужжати ўрганилиши;</p> <p>суд ҳужжати таҳлилида фойдаланилган адабиётлар рўйхати келтирилмаганлиги.</p>	55-70 балл
4.	<p>суд ҳужжатлари ҳақида умумий тасаввурга эга эмаслиги;</p> <p>суд ҳужжати таҳлил қилишда ҳуқуқий атамаларни ўз ўрнида ишлатмасдан, тушунарсиз ва ноаниқ ҳамда мантиқий изчилликка зид ҳолда ёзганлиги;</p> <p>суд ҳужжатини таҳлил қилишда қонун ҳужжатлари манбаларидан умуман фойдаланмаганлиги;</p> <p>суд ҳужжатини таҳлил қилишда касб ва одоб-ахлоқ қоидаларига (плагиат, маълумотларни сохталаштириш, шунингдек ёлғон цитаталар келтиришга йўл қўйиш) риоя қилмаганлиги.</p>	0-54 балл

**Тошкент давлат юридик университети ва Жаҳон иқтисодиёти ва
дипломатия университети 2-, 3-, 4-курс талабалари ўртасида Ўзбекистон
Республикаси Олий судининг веб-сайтида эълон қилинган суд
қарорларини таҳлил қилиш бўйича
танлов комиссия таркиби**

1.	Р.Хакимов	–	Тошкент давлат юридик университети ректори, комиссия раиси
2.	И.Рустамбеков	–	Ўқув ишлари бўйича проректор, комиссия раиси ўринбосари
3.	А.Салаев	–	Ўзбекистон Республикаси Олий суди, БМТ Тараққиёт дастури (БМТ ТД), АҚШ Халқаро тараққиёт агентлиги (USAID)нинг “Ўзбекистонда қонун устуворлиги йўлида ҳамкорлик” қўшма лойиҳа раҳбари (келишувга асосан)
4.	Р. Исмаилова	–	Ўзбекистон Республикаси Олий суди, БМТ Тараққиёт дастури (БМТ ТД), АҚШ халқаро тараққиёт Агентлиги (USAID)нинг “Ўзбекистонда қонун устуворлиги йўлида ҳамкорлик” қўшма лойиҳа таск менеджери (келишувга асосан)
5.	Д.Хабибуллаев	–	Фуқаролик процессуал ва иқтисодий процессуал ҳуқуқи кафедраси мудири, комиссия котиби
6.	З.Эсанова	–	Фуқаролик процессуал ва иқтисодий процессуал ҳуқуқи кафедраси профессори, ю.ф.д.
7.	Ф.Ибротова	–	Фуқаролик процессуал ва иқтисодий процессуал ҳуқуқи кафедраси доцент в.б., ю.ф.н
8.	О.Пирматов	–	Фуқаролик процессуал ва иқтисодий процессуал ҳуқуқи кафедраси доцент в.б., PhD
9.	Г.Мамаримова	–	Фуқаролик процессуал ва иқтисодий процессуал ҳуқуқи кафедраси катта ўқитувчиси
10.	А.Хакбердиев	–	Фуқаролик процессуал ва иқтисодий процессуал ҳуқуқи кафедраси катта ўқитувчиси
11.	А.Хайрулина	–	Фуқаролик процессуал ва иқтисодий процессуал ҳуқуқи кафедраси ўқитувчиси
12.	Д.Артиков	–	Маъмурий ва молия ҳуқуқи кафедраси катта ўқитувчиси
13.	Б.Шамсутдинов	–	Жиноят-процессуал ҳуқуқи кафедраси ўқитувчиси

Изоҳ: комиссиянинг аъзолари бошқа ишга ўтган тақдирда, унинг таркибига ушбу
лавозимга янгидан тайинланган шахслар киритилади.